

## Бир зот...



11:00 / 10.10.2021 1715

Илоҳий каломда бир сўзки қутлуғ,  
Фаришталар ундан ўтмас ҳаёда.  
Онадан афзалроқ, отадан улуғ  
Расулуллоҳ деган зот бор дунёда.

Ўтганлар ўтдилар, келганлар келди,  
Кутганлар кутдилар, билганлар билди.  
Бу ёруғ дунёни чароғон қилди –  
Расулуллоҳ деган зот бор дунёда.

Мусулмон ўғлининг кўнгли хўп тўқдир,  
Сабаб бор – ёзиғлиқ илоҳий тақдир.  
Қоронғу кечада қоқилмоқ йўқдир –  
Расулуллоҳ деган зот бор дунёда.

Офитобдан сўранг, моҳдан сўрангиз,  
Айтурлар, бу надир, ёқут, фарангиз –  
Зулумот ичинда унга қарангиз,  
Расулуллоҳ деган зот бор дунёда.

Саҳобалар кўрди кўзлари билан,  
Юрдилар не баҳтки ўзлари билан.  
Бугун бизга малҳам сўzlари билан –

Расууллоҳ деган зот бор дунёда.

Кетган бўлсалар-да орамиздан-да,  
Аллоҳ етказгувчи ноламиздан-да.  
Чиройлироқ жажжи боламиздан-да,  
Расууллоҳ деган зот бор дунёда.

Ўтмиш юлдузига чўлғанмоқ азоб,  
Тунлари аламдан тўлғанмоқ азоб.  
Оҳ, тушга киргандা, уйғонмоқ азоб,  
Расууллоҳ деган зот бор дунёда.

Одамзод юрарди мотамга ўхшаб,  
Нари борса Адий Хотамга ўхшаб.  
Яшашни ўргатган одамга ўхшаб,  
Расууллоҳ деган зот бор дунёда.

Кўрмаган бўлсак ҳам севгувчимиз у,  
Оғир дам умматим дегувчимиз у,  
Ахир, ғамимизни егувчимиз у –  
Расууллоҳ деган зот бор дунёда.

Ул зотни кўргунча мўмин кулмагай,  
Қарори тўлмагай, кўнгли тўлмагай.  
Шахидлар шоҳида ўлмоқ бўлмагай,  
Расууллоҳ деган зот бор дунёда!

**Маҳмуд Асрор**